

Vnd dieweil sovil schrifften im truck/ vnd sonst wider mein Lehr/ vnd mich außgangen/ im Land umbfliegen/ das ich in der Eyl/ wie wol von nöten wer/ nicht einem yeden auff sein liegen/ lestern felschen / vnd schwermen / volligklich antworten kan / so will ich doch vmb der schwachen willen/ die durch solche schrifften geergert/ geblendet/ vnd verfurt möchten werden/ einem jeden ein wenig antworten/ vnd dem gemeinen mann zuuerstehn geben/ mit was Vntrew/ vnd aus welchem Geist sie wider mich handeln/ Gleich als wann man ein faß anzeppft/ vnd Schmeck Pier daraus gibt/ da man dann aus einem oder zweyen Truncken/ wol schmecken kan/ was im gantzen faß ist/ Vnd will an D. Joachim Morleins Buch anheben.

Schmeckhier: aus Doctor Joachim Morleins Buch.

Erstlich lengt mich D. Morlein an/ als ein vnverschembter/ verruchter Vnman/ da er am 24. schreibt / Ich schließ das vnschuldig Leiden vnd Sterben/ vnsers lieben Herrn vnd Hailands Jesu Christi in dem Artickel der Rechtfertigung aus/ vnd sterckt solche seine Teuffelische Lügen noch paß/ da er daru setzt/ Ich hab solchs in meinem Bekannus öffentlich in Truck geben / so doch nicht ein ainig wort in meynem gantzen Bekannus ist/ damit er solche seine Teuffelische Lügen könt schmucken.

Der